

Fundacion di Arte Arubano cu:

“UN ANOCHI LITERARIO”

STA. CRUZ -- Diabierna 8 di December pa 8:00 di anochi lo ser teni “Un Anochi Literario” den Fort Zoutman na Oranjestad.

E anochi ta encera declamacion, musica, baile y canto, y tambe lo “reviva” algun escena di e famoso obra di sra. Nydia Ecury: “Luna di Papel”, manera entre otro, e conocido “Who the tata be! E actividad cultural aki, ta den cuadro di e prome lustro di Fundacion FUNDARTE, Fundacion Arubano di Arte. Durante e

anochi lo tin presentacion di e bailarina Alidia Wever, declamacion cu Rosabelle Illis, Mayra Lopez y Ruthy Vrieswijk, canto di Coro Melange cu Maybeline Arends-Croes, musica di harpa cu Edgar Kelkboom y cuatrista Doodle Sophia, actuacion di nos estrea Farita Luidens acompaña pa e pianista Fred Dirks, e maestra Diana Antonette cu su Scol di Danza y e gran personahe sra. Nydia Ecury. E anochi den e bunita patio di Fort Zoutman, ta promete di ta uno hopi agradabel pa

henter famia y no ta cobra entrada, pues ta GRATIS. Tur amante di cultura ta invita pa presencia e bunita anochi aki, na unda lo duna reconocimiento na e siguiente 3 personanan y tur esnan cu tin aprecio y admiracion pa e 3 baluartenan di nos cultura, ta ser invita pa presencia e anochi aki.

---NYDIA ECURY---

E curriculum di Nydia ta inmenso pa e actividadnan riba tereno di actuacion, filmacion, como actriz y directora di obranan, traductora, mundo literario cu publicacion di 6 boeki y varios den Papiamento y Ingles. Premionan el a gana hopi den su carrera artistico y tambe como ‘actriz di aña’, mihor comercial di television, ganador di ‘Chapi di Plata’, premio como actriz den diferente festival internacional di teatro y asina por sigui menciona e lista largo di premiacion y e decenas di biaha cu el’a presenta durante festivalnan literario y teatral. Nydia lo ta presente diabierna anochi den Fort Zoutman.

---ALCIDES “CHIDO” QUILOTTE---

Alcides “Chido” Quilotte ta ser considera como un

icono den mundo di teatro na Aruba. E ta un di e actornan mas grandi cu nos isla a conoce, y ademas di esaki a dirigi varios obra, ta traductor y autor di obranan teatral y ganador di varios premio internacional riba tereno di teatro como director y actor. Su trayectoria riba tereno teatral na Aruba ta inmenso, pero debi na quebrante di salud e no ta mucho activo mas.

---BURNY EVERY---

Na luna di Augustus e aña aki, Aruba a perde un gran dama di teatro, sra. Burny Every. Un maestra y profesional, no solamente como directora y actriz formidabel, pero tambe como autor di obranan teatral, traductor di obranan di fama y tambe conoci pa su obranan

literal, riba tereno di poesia. Su obranan a ser publica den varios revista y den varios idioma. Burny Every a dedica su bida na teatro y educa nos hobennan tanto na Academia Pedagogico / IPA y na Colegio Arubano. El’a participa den varios filmacion y a actua cu artistanan cu awe ta famoso, entre otro Rutger Hauer cu tabata su compañero di estudio. El’a dirigi filmacion di e prome pelicula Arubano, “Dera Gay” di Dennis Henriquez y colabora den “Duel in de Diepte”.

No perde e oportunidad pa presencia un tremendo anochi cultural diabierna dia 8 di December den Fort Zoutman y pa ta den e patio prome cu 8’or di anochi.